

樵

風

樂

府

樵風樂府卷五

高密鄭文焯叔問

賀新郎

秋恨

暗雨淒鄰笛感秋魂吟邊憔悴過江詞客非
霧非煙神州渺愁入一天冤碧夢不到青蕪
舊國休灑西風新亭淚障狂瀾猶有東南壁
空掩袂望雲北雕闌玉砌都陳迹黯重扃
夷歌野哭晦冥朝夕十萬橫磨今安在贏得
胡塵千尺問天地榛荆誰闢夜半有人持山

去驀崩舟墜壑蛟龍泣還念此斷腸直

日落羌笳咽認一行高鴻盡處五雲城闕滿
眼驚塵還鄉夢重見昆池灰劫更馬上琵琶
催發露冷橫門移盤去甚金仙也怨關山別
愁寄與漢家月 故人抗議多風烈漫銷魂
題詩隴樹誰旌奇節易水空成填恨海西北
終憂天缺但目盡平煙區脫不信天心渾如
醉好江山換了啼鵲血長劒倚向誰說

菩薩蠻

望月有懷

桂宮寂寞花前後天堦玉露金風驟雲外小
驂鸞也愁高處寒夜明秋半鏡暗缺山河
影燈火夢長安覺來西笑難

謁金門

行不得驀地衰楊愁折霜裂馬聲寒特特雁
飛關月黑目斷浮雲西北不忍思君顏色
昨日主人今日客青山非故國

留不得腸斷故宮秋色瑤殿瑤樓波影直夕
陽人獨立見說長安如弈不忍問君蹤迹
水驛山郵都未識夢回何處覓

歸不得一夜林烏頭白落月關山何處笛馬
嘶還向北魚雁沈沈江國不忍聞君消息
恨不奮飛生六翼亂雲愁似霧

漢宮春

庚子閏中秋

明月誰家甚今年今夕多事重圓移盤夜辭
漢闕貯淚銅仙珠簾畫棟倒寒波空影如煙
魂斷處長門燭暗數聲驚雁蠻弦還見山
河殘影恁磨成桂斧補恨無天淒涼鏡塵頓
掩雲裏嬋娟東華故事祝團圓歸夢空懸凝

望久蓬壺翠水西流好送槎還

玉樓春

城西樓晚眺

驚煙連海掀風色遼雁秋稀音信隔王孫芳
草不成歸綠徧天涯無路陌 懸懸愁眼迷
雲北到處登臨懷故國夕陽樓上好青山只
是黃昏留不得

雨霖鈴

恨別和柳屯田

并刀難切是離腸恨夢雨都歇繁華似水流

去回首處車塵臨發冷落關河送遠有孤雁
悽噎念舊苑衰柳寒煙玉笛吹愁滿空闊
銅駝陌上傷今別更斷魂客裏催佳節黃昏
滿地花影依約見故園秋月萬里清霜休問
香篝翠被誰設卻怨入簾底西風付與殘蛩
說

摸魚兒

滬江送春詞

更尊前幾回西笑茫茫時事如許長安一雨
分新舊惟有夕陽無主春思苦怕花滿紅桑

無地悲離黍春歸甚處但殘燕空林亂鶯芳
草總是斷魂路 嗟遲暮休倚蘭成詞賦江
關贏得孤旅高樓縱續笙歌夢愁帶北來笳
鼓鄉信阻想寂寞珠簾尙捲西山雨淒絃自
語恁冷淚成波荒波變酒澆徧趙州土

燕山亭

題白畫薊門秋柳圖

衰柳空城羌笛數聲溼了樓臺煙雨珠箔四
垂客燕迷歸棲老綠陰無主弱不禁攀更愁
唱陽關西去凝伫賸舊苑歌塵暗飄金縷

還記騎馬章臺正花拂長堤麴波隨步而今
莫問解舞腰肢淒涼故宮誰妒便喚春回忍
再見倚簾吹絮歧路腸斷也一絲絲苦

御街行

紅橋飲席感少年事

峭寒翦翦風如水又亂颭花陰碎月明橋上
玉闌干曾見凭春羅袂好天涼月依然昨夜
只是人憔悴 當時何限風流地儘賺得銷
魂計年來對酒怕聞歌換了疏狂身世分明
襟上唾花醉粉都作今朝淚

過秦樓

後溪連雨新淥平橋一樓卧臨城西陂
船舫皆從几案間過晚霽見月水光花
影澹然空寒有懷丁酉秋石壁山望湖
臺夜遊流連光景動踰歲時遭世亂離
遊情匪昔感時屬景不自知其詞之淒
異也

過雨檐花透風窗竹露點翠梧金井林梢小
閣曲枕溪流靜綠盪胸千頃簾捲夜近銀河
秋浸天階水明星靜欠追涼綺袖一枝橫玉

滿身雲影 迴憶處月氣湖煙空臺搖落上
下卧臨清鏡淩波弱步溼霧香鬟夢斷數峰
青迴年事如今暗驚燕草天荒吳楓江冷但
孤雲遠水愁入離痕淚枕

玉樓春

春風秋月資遊計獨我尊前長費淚幾生心
苦到詞人風月只供惆悵地 繁華故國今
何世滿目山河成古事小樓孤燭夢同時著
枕愁來無處避

楊柳枝

數行煙柳薊門春
離袂經年惹麴塵
莫爲西風搖落早
灞陵猶有未歸人

長條如帶水縈環
難繫離愁百二關
羨爾巢林雙燕子
秋來暫客尙知還

暫理愁眉試半妝
舞衣疊淚損宮黃
晴絲繞徧天涯路
不爲離人續斷腸

迴雪吹花唱大堤
弓腰鬪罷夢長啼
身輕不及枝頭絮
猶逐東風舞向西

亂絲歧路苦愁縈
翦翦輕風別有情
一夜雪絲吹滿帳
教人春夢不分明

夾道分堤翠浪生湖山歌舞總堪驚只今一片斜陽樹賸有宮鴉嘯數聲

煙洗風梳碧可憐秋深猶咽五更蟬誰家殘月滄波苑時見漁舟網碎鈿

故國年芳換綠塵樓臺多是別家春狂花一陣過無影亂入宮城不避人

水明帳殿月如煙翠縷連雲挂玉泉香輦不迴秋又晚棲烏頭白近霜天

破曉殘鶯出禁林飛花寒食雨沈沈章臺自古牽行色莫爲離多減路陰

樓閣春深雪不寒
關山秋早笛初殘
一般畫出傷心色
漫作隋堤落照看

纖纖新翠帶愁顰
零落弓彎舊舞人
底事臨風眠未起
靈和不是漢時春

拂徧京塵宰地驚
風條雨葉不勝情
西園已自無多樹
一夜傷秋轉費聲

平居誰分解傷春
競賭長楸走馬身
寂寞空城飛絮盡
羌笳吹起六街塵

高秋蕭瑟思何堪
昔樹空悲憶漢南
任是婆娑生意盡
不辭風雪老江潭

浪淘沙慢

江南早春鄧尉山梅垂垂欲發因憶己
丑秋方舟載酒與湘潭王王秋二三同
志山澤行吟連句和清真此曲極歲晚
清逸之娛勿勿舊遊奄踰一紀年荒時
難俊侶飄零今見園中南枝初葩斜月
在水將治舟討春西磧閒淒獨之感哀
斷成歌再和清真繞枝三帀興言昔懷
益以重予離憂也

墜月悄花光練結夢繞西磧倒影浮杯盡綠

吹香點袖自碧想載雪橫江澆大白正暝躡
一葉蒼茫又數峰青入短篷笛煙水弄愁色
脈脈旅懷仗酒能釋歎遊舊零落如花雨
孤絕尋芳客認石屏苔屐依稀陳迹眼前好
景空繞枝百轉愁腸都窄年事換傷春殘橐
西園約夢境頓隔翠禽曉繁英滿路陌似淚
粉亂點東風悵恨極清歌更有何人拍

右比竹餘音舊刻四卷始丁酉訖辛丑凡
一百六十二首刪存五十二首

樵風樂府卷六

高密鄭文焯叔問

玉燭新

小春海棠 夢窗詞手稿有是題丁香
結一解江南冬煥春卉再萼而海棠益
淒麗可玩因依夢窗題格賦之

冰綃和淚浣又夢喚春回繞花千轉鳳窠織
就同心錦肯爲傷秋腸斷嬌霞半面趁醉夜
珠簾重捲催冷豔還照珍叢愁凝蠟盤紅短
依依睡起西闌怪海國狂塵舊芳都換倚

寒翠袖應自惜鏡裏過時勻染移春小檻問
月地雲階誰見休再覓顛嫁東風妝成恨晚
法曲獻仙音

靈巖覽古次韻夢窗

妝濯池花步鳴廊葉晚色蒼涼僧院亂石牛
羊古臺麋鹿江楓黯愁霜點近水市菱歌起
吳聲鎮哀怨曠懷遠問鴟夷載春何處怱
悵地一徑舊香恨染箭引越來谿射晴波秋
練如翦廢柳殘蟬替宮魂歌舞腸斷算繁華
成沼故國青山還見

八聲甘州

琴臺據吳故宮離城之上舊志所謂高
可見三百里洵登覽之逸地也余與半
塘老人西崦迴舟從木瀆步上絕頂高
誦君特秋與雲平之句一時豪槩陵轍
今古因乘興更作天平之遊時已暮色
蒼然共和吳詞相與徘徊而不能去

盪巖霏弄晚點荒寒漁燈兩三星歎風流殘
霸湖山靈氣空葬傾城一鏡吳波變沼花雨
洗蠻腥片石興亡恨玉軫無聲 惟有西江

明月照故宮殘夢梧葉催醒柰登臨愁眼還
向此山青更誰吹烏棲哀調喚暮鴻煙際落
蘆汀餘情寄白雲題句連步天平

湘月

天平山上白雲亭酌泉晚眺欲尋遠公
石屋不果歸路看紅葉泊鷺飛浜作

亂峰喚客引幽筇蘚步飛上空翠舊賞林亭
更暝蹋到地秋聲紅碎裂壁通樵崩厓辟鳥
風谷鏗環佩斜陽屏畫舞楓欲共天醉別
有石竈松煙半坳雲乳瀉連筒珠綴滴盡吳

根怕化作一朶滄波殘淚巖迹臺荒湖光鏡
冷秋思生高袂靈扃何許雨花夾磴飄墜

天香

石濤和尚爲勝國楚藩之裔以詩畫逃
禪高逸絕世海鹽陳氏藏其所製鼻煙
壺以西藏貝多樹子爲之上有程松門
刻小象并壺銘余愛其樸栗古致爲賦
一解乞得此壺亦香國中鼻功德也

薰亞金絲香參玉壘沈沈冷麝如水故國茄
花王孫芳草盡化海山雲氣半囊晻藹空悟

破枯禪一指休問壺天日月銷磨苾芻身世
拈來信多妙諦貯烟煴寫經餘事歎息百
年碩果等閒匏繫萬感都成蠟味

西洋人名
盛煙瓶曰

蠟

但愁惹西來暗塵起更倦殘熏生酸老淚

蘭陵王

舊社老友張兄子苾薄宦秦中勿勿十
年以癸卯三月歿於大荔今墓有宿草
已其室人曾氏季碩才豔有詩名蚤卒
吳下同入爲之卜葬於橫山傷心之極
致欲歌其事輒哀斷不能聲茲誦研生

中實兩使君輓詞皆和清真此閱觸緒
悲來感音而作不自知其涕之何從也

斷腸直春夢池塘自碧吳牋恨零落舊題別
後湖山總無色淒涼戀去國同識蜉蝣過客
低徊處春樹暮雲江鯉沈沈素書尺南遊
共萍迹記載雪連橈吟月移席一官直等嗟
來食愁萬里蓬轉十年匏繫長安漂泊似傳
驛但魂繞關北哀惻歲時積歎蜀錦江空
秦鏡塵寂瑤華玉匣傷心極怕腹痛迴軫感
音鄰笛招魂何處淚萬點當酒滴

念奴嬌

甲辰仲夏半塘老人過江訪舊重會吳
皋感遇成歌以致言歎不足之意

小山叢桂問淹留何意空歌招隱自見淮南
佳客散雞犬都霑仙分碧海三塵白雲孤抱
不羨靈飛景仙才誰惜世閒空舐丹鼎我
亦大鶴天邊數峰危嘯一覺松風枕三十六
鷗盟未遠獨立滄江秋影詞賦哀時湖山送
老吟望吳楓冷梅根重醉舊狂清事能領

鷓鴣天

余與半塘老人有西崦卜鄰之約人事
好乖高言在昔款然良對感述前遊時
復悽絕

據榻連吟數往年夜窗櫺馬警秋眠可憐燕
市尊前月又共吳雲夢裏天 回首處一潛
然小山招隱有新篇淮南幾樹留人桂縱得
攀援不得仙

秋老山橋虎氣沈霜風呼酒舊登臨梵鐘出
樹巖扉迴漁火通波雨塢深 連權路五湖
心別來三見冷楓吟白雲定識非生客莫枉

芝崦鶴夢尋

諫草焚餘老更狂
西臺痛哭恨茫茫
秋江波冷容鷗迹
故國天空到雁行
詩夢短酒悲長
青山白髮又殊鄉
江南自古傷心地
未信多才累庾郎

浣谿沙

甲辰中秋後二日晚晴放舟石湖觀越
城橋下弗月明日將從胥口探桂山中
不預此遊蓋五年矣

谿上曾聞渡越兵
亂流猶似怒蛙鳴
蒲風杉

雨戰秋聲 梧夢只今空故苑
菱歌依舊繞 離城長橋人散月孤明

花豔連橈度 鏡光滿湖絲管水飛香
月明何恨預興亡 莫攬清歌悲小海
更催秋夢落 橫塘波空塔影白淒涼

煙夕涼波起 白蘋薦紅落粉盡歌塵依稀
山黛可憐顰 一舸誰尋鰕菜路千絲
空羨鱸 殘鱗無多秋事屬閒人

夜午看山舊寺樓別來巖桂五經秋
好花涼月醉扶頭 一水又平橋畔路
幾人曾預鏡

中遊山陽殘笛更吹愁

聽水聽歌醉夢間
秋衣零露夜忘還
拍浮人與白鷗閒
餘興好探花裏市
舊情不斷枕邊山
半篷風色過梅灣

舊泊橫橋花覆船
酒燈人語隔湖煙
紅簫腸斷十年前
經醉谿山如此夜
後逢花月奈何天
漫吟秋扇黯淒漣

鷓鴣天

胥口是范蠡從入五湖處
秋夕覽古有懷

雲物淒清秋滿湖遺愁夢落故宮梧西江終
古無情碧送了鴟夷便沼吳煙草迴水禽
呼越谿寒雨戰菰蒲扁舟賺得西施去枉費
良金寫作圖

高陽臺

伯弢見過將尋鄧尉看梅之約余病未
能勿勿別去念其白門寥落賦以寄懷
燈市星闌橋浜雪老傷春倦賦登臨舊燕重
逢十年猶白巢林渡江柳眼青如許見故人
江上愁心感前塵珠箔寒飄鏡縷顏侵東

風又綠離憂草記捐芳楚佩題淚吳襟夢冷
銅駝可憐人事俱沈五湖未了扁舟興怕亂
愁還比花深掩園扉行藥歸來一枕春陰

鷓鴣天

細語檐禽破曉霏竹聲涼翠夢先知酒醒一
枕紅蘭淚染取蠻牋牘寫詩幽事淺世情
稀閒花飛盡見高枝一春雨橫風狂過綠徧
池塘無是非

清平樂

舊寒如水波織簾花碎小雨櫻桃紅漲地猶

是去年天氣 貪眠笑比吳蠶東風醒醉長
兼判卻一春怊悵爲誰腸斷江南

二郎神

和湘綺翁西安北苑題壁

夕陽舊苑又過客曼歌離黍想雲近仙居香
昏龍氣空鎖千門勝署漫說長安堪西笑儘
夢逐京塵飛去嗟殿柳燕歸宮槐蟬斷暗聞
鈴語 前度畫輪移雉玉堦班鷺看地轉天
迴終南古黛不減西山翠嫵漢月懸秋秦雲
媚晚銷得楚狂題句但暗憶彩筆曾干氣象

白頭非故

一萼紅

春餘夏始。園卉向殘，檐果垂熟。綠陰如
夢，舊雨不來，卽事和白石此解以寓興。
晚簾陰又韶紅，換景闌藥已抽簪。芳援疏籬，
珍叢疊架，天似殘醉沈沈。乍過雨，櫻桃爛熟，
款好語，檐際下幽禽。舊賞林亭，俊遊裙屐，呼
酒誰臨。還念庾郎顚顚，託臨江故宅，倦賦
愁心。萍迹鷗輕松巢鶴老，塵外吟境堪尋。待
新句琅玕，徧刻有清籟相和，冷敲金。寫入谿

山畫圖閉戶雲深

滿江紅

乙巳之秋誅茅吳小城東新營所住激
流植援曠若江邨歲晚悽寒流離世故
有感老杜卜居之作聊復勞者歌其事
云

竹隔橋南有竹裏人家小葺依約似浣花門
徑數椽幽僻居近梅家西市隱補吟桂樹東
城植念歲寒何意老江邨今非昔 懷舊隱
三高宅空遐慕五噫客歎百年枯苑一般陳

迹歸燕猶尋斜日壘間鷗且占滄波席待到
門春漲櫂歌來漁榔集

法曲獻仙音

園居春盡病起聞雨述懷

詩骨裁花酒香行藥徑曲蒼苔埋步暗燭吹
煙冷篝銷雪悵悵晚寒簾戶甚夢也和天瘦
空堦夜還雨 悄吟緒占吳根小城一角牆
柳外依約遠山黛嫵絮捲陌塵飛放東風鶯
燕無主故國樓臺映滄波空賸歌舞怕雕闌
都換更倚傷春高處

鷓鴣天

水竹依稀濠上園
蒼煙五畝絕塵喧
半牀落葉書連屋
一雨漂花船到門
寒事早戀清尊
狸奴長伴夜氈溫
老來睡味甜於蜜
爛嚼梅花是夢痕

西子妝慢

吳小城 越絕書城周十二里高四丈
七尺門三皆有樓
吳地記引虞覽家記
云吳小城白門闔閭所作
秦始皇時守
宮吏燭燕窟失火燒宮而門樓尙存是

知小城卽吳宮之禁門又謂之舊子城也歷漢唐宋以爲郡治舊有齊雲觀風二樓並在子城上爲郡僚賓燕之所見之唐賢歌詠獨多明初惟餘南門頽垣上置官鼓司更郡志載今自乘魚橋至金姆橋而東高岡迤邐是其遺址城四面舊皆水道卽子城濠所謂錦帆涇也其東尙有故蹟號爲濠股今余之所經構證以圖經此間乃兼有其勝五畝之居刻意林谷旣擁小城聊當一丘涇之

水又資園挽可以釣遊不出戶庭而山
澤之性以適豈必登姑蘇望五湖始足
發思古之幽情耶分題賦此因併及之
山送月來水漂花出一片吳墟焦土坡陀衰
草下牛羊鎮蒼涼廢譙沈鼓青蕪漫賦歎殘
霸都傾一顧話遺塵有故宮歸燕傷心高處
登臨阻玉檻瑤梯夢斷香屨步只餘秋色
過牆來做愁顰岫眉當戶霜笳暗度恁吹徹
觚棱無主賸荒丘夜夜唳烏更苦

念奴嬌

錦帆涇

一濠賸綠有當年西子淩波塵影分得香谿
三尺玉曾試春風宮錦仙步翩鴻豔歌浮鷁
轉燭空明鏡漂花暮水繞城猶作荒哽 休
問金姆橋邊滄波故苑遊鹿苔蹊冷越網干
絲腸共斷輸與菱娃煙艇疏蓼棲霜衰荷戰
雨門外秋光迴漁磯分席隔離時喚清飲

小重山令

雨落春閒竹窗散帙見彊邨翁和紫霞
舊詞清興難同年事易盡記去年樵風

園聽雨正此時也

一雨添花作地衣傷春春不見夢依稀吳蠶
猶續去年絲相思老休織斷腸詞酒醒昔
遊非西園題恨處幾斜暉扁舟心事白鷗知
清風過長掃竹間扉

樵風樂府卷七

高密鄭文焯叔問

惜紅衣

中秋夜彊邨翁躡月見過秋花宛變襟
韻清浹因和白石自製無射宮一曲兼
寄伯宛舍人滬上

醉枕銷涼吟牋度日枉拋心力灑袂清風苔
扉款深碧涼蟾似水還解伴江城秋客沈寂
留坐桂叢憶年時遊息蕭條巷陌躡葉迴
廊題愁亂紅藉相思夢老海國望雲北料得

舊盟鷗鷺省慣倦遊來歷奈後逢良夜空照
屋梁顏色

前調

秋來久不得伯宛消息感歎歲暮胥疏
江湖時無延引之者昨彊老書來述其
將治北裝秋期違踐復事遠遊悵然繼
聲白石不能無西園之思也

別夢催秋遊情展日倦吟餘力聽雨殘尊櫓
花汎湘碧書期間阻空竚想淞濱幽客音寂
江燕晚棲覓巢林休息京塵故陌滿眼驕

雲詩狂久聲藉飄零恨似去國曠南北可憶
亂離山水老境不堪重歷算壓裝紉素添作
一江行色

前調

彊邨翁早退遺榮舊有吳皋卜鄰之約
謁來滬江皇皇未暇近將移家小市橋
吳氏聽楓園先以書來商略新營作蒼
煙寂寞之友卻寄此以堅其志再和白
石

玩月來時乘濤去日試帆風力倦卧滄江淞

波翦愁碧吳縑換句頻寄慰東園書客蕭寂
吟伴歲寒卻移枝棲息 花蹊柳陌舊賞亭
池苔茵翠堪藉佳鄰買斷水國小橋北漫說
五湖三畝林下幾人身歷趁冷楓題醉不羨
隔牆春色

前調

歲晚有懷繼歌以寫

舊思停雲高歌送日感秋頽力隔雨江樓冥
鴻怨遙碧蘭泣淚把憑寄贈長安遊客淒寂
詩夢倦尋說風流都息 銅駝廣陌粉醉金

迷狂塵總陵藉羈吟睠念上國海山北耐得
一丘吾老不數十洲颺歷但歲寒尊俎誰賞
菊叢佳色

前調

涇上幽居覽古悲秋有江山搖落之感
疊用舊韻寄慨於言

側帽高秋題襟勝日舊狂才力倦賦登臨松
關卧荒碧江空歲晚天付與樵風圍客清寂
滄海夢還覺龍吟波息 珠塵綺陌棲老年
芳如今草堪藉高樓望斷舊國渺西北依約

廢陂衰柳猶識越兵來歷對小城煙樹紅入
夕陽無色

前調

白石道人製此曲覽淒清之風物寫故
國之離憂余嘗考訂故譜證以管色可
略而言其所謂以無射宮歌之者當屬
入聲商調曲見之唐段安節樂府雜錄
別樂五音圖詞中凡入聲字律綦嚴匪
盡關夾協例其旁譜煞聲用下凡及五
字則依無射宮之本律而寄煞於太簇

角半律之清聲初唐樂書要錄所稱凡
管長聲濁不例者以清聲竝之是也白
石自度曲多緣飾唐譜此其義例爾茲
與彊邨翁連情疊韻數相喁于有類元
白詩筒故事因以舉似感此古音往復
依永淒然其爲秋也

斷闕吟秋連筒計日費人歌力怨疊清商衰
蘭薦寒碧旗亭舊價空送老江南詞客幽寂
雲水唱酬託微波通息 苔錢萬陌買盡閒
愁傷秋鬢蓬藉青蕪夢繞舊國雁行北漫憶

十年塵事滄海幾回親歷賦桂叢招隱分半
石芝山色

驀山谿

吳城小市橋宋詞人吳應之紅梅閣故
地也橋東今爲吳氏聽楓園水木明瑟
以老楓受名紅葉池亭不減舊家春色
且先後竝屬延陵於勝地若有前因彊
邨翁近僦其園爲行窩翁所著詞聲滿
天地折紅梅一曲未得專美於前也爰
託近意歌以頌之

故家喬木門巷橋通市市隱有林巒記聽秋
冷楓疏綺定巢新燕胥宇報先聲輕夢占舊
樓臺解道遷鶯喜紅梅一曲詞客風流地
霜葉勝花妍算吳歌好音能繼漁樵爭席輸
與海鷗閒秋色裏許平分早辦爲鄰計

蹋莎行

丁未秋夕石湖醉泊登千巖觀玩月有
憶昔年連櫂之遊

桂影篩金竹聲碎玉西風涼到文波縠鏡花
曾見夜妝紅巖霏不上秋眉綠蹋月谿橋

題雲礪屋傷心易觸登臨目清歌如水夢如
塵舊遊腸斷無因續

臨江仙

潯陽歲除

歲歲無聊當此夕那堪聽雪關津一杯藍尾
怕霑脣離聲殘雨夜歸思亂山春帝里風
光饒節物老來夢迹都陳梅花應笑渡江人
寒燒官燭短愁試客衣新

燭影搖紅

江春殘雪試燈初夜有憶吳市舊遊和

夢窗元夕微雨韻寄伯弢彊邨蘇州

雪黯江城滿湖嵐氣春寒淺上燈樓閣晚晴
初簫鼓誰家院蜜苳圍香正暖夜蛾愁行雲
蘸徧舊情無柰蹋月歌沈淩波塵濺轉燭
年端雨聲空切吳娘怨小梅落靨又東風偏
趁天涯看憶別皋橋酒散寄橫枝江南夢遠
暗聞笛語早晚歸舟花香篷捲

水龍吟

皋橋水樓曲宴醉別瞻園會余歲暮有
九江之役載雪過白門願言不從賦此

感歎

出門一笑橫江酒醒重問皋橋旅殘釭厭夢
離杯銜淚傷春歧路三十年前相逢同是承
平俊侶換滄波身世雲愁海思算萍梗知人
苦 不信蘭成老去賺狂名蕭條詞賦江山
如此文章何用英雄無主獨立蒼茫樓船西
下清淮東注欠胡牀爲弄梅花笛裏喚青溪
步

瑞龍吟

聽楓園餞春席上和清真

尋詩路還記小市蒼煙舊家紅樹依稀殘月
殘花麗情俊賞銷凝是處曠吟竚猶有定
巢新燕占春簾戶留連晚色年芳畫屏翠燼
餘香共語前度京塵遊袂酒邊聯唱花間
愁舞重見斷魂天涯人換新故江郎恨筆休
倚傷春句飄零又南樓罷飲西園歸步世事
浮雲去老懷到此茫茫萬緒不絕情如縷和
淚挽東風哀絃連雨夢歌怨疊一江萍絮

前調

裒碧先生和清真是闕見示懷古傷春

高健處不減耆卿風格繼聲報之

西橋路還認故苑飄花小城敲樹悽悽江國
年芳怨紅淚粉魂銷甚處 悄延竚休念舊
狂清事鏤香題戶悲來一曲回風滿汀墮蕙
零絃自語 空度春光流景引杯看劒愁多
慵舞腸斷庾郎哀吟知爲誰故推煙唾月何
用驚人句傷心見新亭老淚臨江遺步轉燭
絲華去酒醒自理悲歡墜緒年鬢催霜縷歸
夢繞沈沈荒臺雲雨楚天恨隔夕陽飛絮

霜花腴

懷夢窗楊柳閬門故居卽用其自度曲

韻

過江舊客悵倦遊浮生誤了儒冠西館花飛
南橋萍老吳城久住偏難水天夢寬奈燕歸
飄泊依前歎巢痕閱盡東風夕陽喬木想高
寒京國舊居如驛又金閬柳色幾換吟蟬
華屋空丘神州沈陸茗茗此恨誰牋夜鐘到
船認故山愁黛連娟感年芳送老秋詞斷雲
和夢看

一萼紅

園夏卽賞

半陰晴殢雲容雨意梅熟又江城簾桁凝煙
庭除潑水空想歌扇花縈漸衣潤添香滿鴨
費熨帖春恨總難平鬪草人歸采蘭天近誰
喚愁醒 依約一年芳事奈新期舊賞節物
堪驚尋夢蕉迷追涼竹醉閒晝長解塵纓看
高柳池塘自碧怕重見江燕共秋零最憶清
風故人一枕詩聲

聲聲慢

臞庵撫部晚秋宴席

庭柯疏桂井榦寒梧蕭森幕府清秋楚佩蘭
情相將珠履風流戟門夜澄如水詠凝香傳
徧吳謳追雅宴勝雲開東閣月滿南樓 回
憶霜臺舊柏映花明旌節江國鳴騶白髮丹
心吟湘夢繞神州一池晚蓮紅汎點餘波容
有閒鷗延勝賞好湖山尊俎借籌

前調

秋雨酬瞻園同年

荒苔綦迹落葉詩聲孤檠聽雨江關寂寞魚
龍滄波獨放鷗閒西風庾愁催賦賸空園棲

老霜菅念遊舊有詞壇白雪幕府青山楚
客悲秋何限只斑斑竹淚迸付蕉彈銅狄摩
挲曾歌漢月移盤南雲夢華重聚薦吳尊休
汎衰蘭曠吟望鎮哀時相共歲寒

前調

秋晚索居簡彊邨有懷京國舊遊

檐花殘雨廊葉新霜愁聞秋盡啼蛩水石高
閒琴尊歲晚稀逢隔江亂雲催暝卧空山獨
對寒松倦遊感話遼天歸鶴湘浦來鴻一
夢驚塵漢闕記金坡劒履折檻家風清淺蓬

萊仙槎換了漁篷栖栖五湖心事放虛舟伴
老雲東正淒悄見斜陽天外數峰

高陽臺

圓夜寒尊與彊老清話待月溪堂有煙
水蒼茫之感明日賦此索和

連榻聽松過門看竹相期放迹林巒一卧滄
江秋光幾換顏顏淒淒夜雨黃花淚更爲誰
彈滿西闌恁銷沈玉海珊枝不挂漁竿 曾
傳交讓池邊樹有吳僑竝宅偕隱高閒片席
鷗波應通鶴夢清寒歸雲已是忘機地漫醉

拋屋裏青山最知心斜月窺尊長送君還

滿庭芳

新治西寮歲晚敘意輒題一解時戊申

十月

鄰寺霜鐘故城煙柳曠如家住江邨半谿黃
葉老樹自知門胥宇還來舊燕花落後爲補
巢痕閒情有白鷗留客呼取隔離尊樓臺
誰是主夢中槐蟻總付秋魂算扁舟身世猶
繫吳根向晚青山更好人外想林屋風存生
涯託幽居水竹漁釣長兒孫

月下笛

寒夜聞牀下蟋蟀感憶

落葉閒階秋聲徇了爲誰吟苦霜蟾挂戶漏
籤遲帶愁度王孫已是無魂斷更何意淒涼
自語正機絲淚織轆轤腸轉耿耿殘曙凝
竚尋秋處記鬪草金籠舊家兒女閒情換日
歲寒時事如許蟲天萬感沈沈夜忍重聽空
簾暗雨漫怊悵說與燈前事夢也無據

迷神引

看月開簾驚飛雨萬葉戰秋紅苦霜颿鴈落

繞滄波路一聲聲催笳管替人語銀燭金鑪
夜夢何處到此無聊地旅魂阻 睠想神京
縹緲非煙霧對舊河山新歌舞好天良夕怪
輕換華年柱塞庭寒江關暗斷鐘鼓寂寞衰
燈側空淚注萋萋雲端隔寄愁去

安公子

急雨驚鳴瓦轉檐風葉紛如灑閉戶青山飛
不去對滄洲屏畫換眼底衰紅敗翠供愁寫
窺冷檠半落吟邊炮正酒醒無寐怊悵京書
題罷 到此沈沈夜爲誰清淚如鉛瀉夢想

銅駝歌哭地送西園車馬歎去後闌干一霎
花開謝空怨啼望帝春魂化算歲寒南鶴解
道堯年舊話

樵風樂府卷八

高密鄭文焯叔問

木蘭花慢

已西閨春園梅盛開時彊邨翁以特徵
不起高卧空齋因置酒招之極意吟賞
有林下相從之樂賦以見志

閉門春不管又何處放春來自卧雪西園垂
垂江樹空老莓苔徘徊冷香水驛甚長安花
事等閒催欲把一枝寄與好風吹向誰開
安排澗曲林隈尋蠟屐薦吟杯歎舊家紅萼

幾番羌管搖落池臺高懷歲寒共守勝看人
調鼎費羹材認取逋山斜月莫教鶴夢輕猜
御街行

送春

誰家故苑東風樹樓閣花深護慣將芳恨語
流鶯不惜花枝高處那堪一夜人閒春夢百
轉留難住 夕陽流水漂香去殘淚紛如絮
畫闌十二可憐春無奈借人歌舞黃昏易散
沈沈簾影一片西山雨

蜨戀花

春雨晚來過一陣送了清明有限花番信又
是傷春天氣近陰晴半日都難定 見說好
春新值閏如夢如醒依舊年時病人事音書
誰與問遊絲舞絮空添恨

幾日層城春漏洩小檻調鶯宛轉新柔舌好
夢不堪春後說空林猶有嘯鶻血 蘭麝罷
熏山枕熱酒醒闌干滿面楊花雪羌管有情
吹不徹亂雲過影中庭月

花月一春供幾醉染柳熏梅費盡鉛華水簾
幕塵塵如夢裏爲誰斷送傷心地 不信東

風能換世過半韶光怙悵無多事題淚花枝
難遠寄燕鶯空訴留春計

落盡江梅春已半浪蕊狂花不到傷春眼一
夜金鈴消息斷只供蜂蝶喧塵亂陌上馬
蹏梁上燕解惜香泥已是韶紅變斜日簾窠
人不見薜蘿雪老誰家苑

高陽臺

己酉重午西園飲席感懷

梅雨團金蘭風灑翠吟觴又汎香蒲鬪草闌
千餘薰更滌芳裾宮魂枉續長生縷誤舊情

臂約紅疏感年光明鏡波心不鑄顏朱
泪羅一片傷心碧作中流簫鼓遺恨江魚清些
難招沈哀欲變吳歛江潭自古蛟龍惡但怨
魂綠老汀菰鎮銷凝節物淒涼午醉誰扶

鷓鴣天

見舊家樓上燕巢感憶

寂寞梁塵翠
紫隔花曾聽下簾聲
綢繆去
補誰家屋
飄泊今憐故主情
泥墮處舊聞
箏春風秋月總堪驚
謝堂只是尋常見
未信巢林誤此生

采桑子

竹聲到枕涼如許翠溼紗幮香斷燈孤冰簟
銀牀一夜疏曉來獨步穿花去羅袂沾濡
滿把明珠始覺前谿過雨初

雨簾不捲初疑夜夢地模糊竹醉花扶過枕
茶聲午睡餘故人久斷江干信借問庭梧
秋意何如一日西風一日疏

竹馬子

秋江離席

尋橋柳荒溼城蕪古苑去波孤艇見帆明渚

鳥鐙昏驛樹嵐光催暝陡覺畫角生哀秋聲
在水際空離景對此戀前遊繞迴闌憑斷斜
陽紅冷萬感成幽阻良辰易失賞心難併
天涯頓雪雙鬢愁入西風淒哽但憶舊扇歌
塵小屏詩夢人隔瀟湘迴尊前雁落滿目關
山影

陽臺路

送客晚歸城西陂攬景成詠

暮山遠見倒空翠溼雲開萍面蕩荒灣雨氣
衰荷秋在水燈紅颭愁殺渡江人醉裏解攜
樵風樂府

卷八

四雙照樓

夢隨波轉離聲斷又暗催湘絃鴻陣零亂
獨繞橫橋歸路澹一水漂花舊苑片帆風影
尙映帶凭高闌檻銷魂又寒林墮月寂寞小
城西畔空簾捲亂蟲天如聞哀歎

八聲甘州

江皋野宴重別龍馬里叟

度高城夕吹抵陽關一聲九迴腸正霜隄衰
柳煙汀墮蕙夢落蒼茫到此登臨送遠攬景
惜離觴滿眼滄波淚流盡三湘同是江湖
蓬轉奈庾愁染鬢空點吳霜羨秋篷歸釣猶

及著芙蓉想芳洲蘋花自采但寄情鷗鷺莫
相忘空凝佇楚天孤雁寂歷南翔

蜨戀花

己酉中秋夜雨

好月一年能幾見待得圓時抵死雲遮徧可
惜良宵天不管酒燈暗雨深深院梧葉灑
階愁萬點不聽清歌已是無腸斷舊節惟酬
雙淚眼西闌一夜秋聲滿

長憶紅樓離夜語月滿芳尊賞月人徧去自
見月圓無此苦年年情恨天難補欲喚姮

娥憑說與淚溼花枝故作黃昏雨後夜相看
腸斷處一彎又被愁眉妒

蘭陵王

題北齊蘭陵王墓碑 慶湖遺老集有

題此碑詩五言附考云墓在滏陽西南
十里道占其東夏潦所湊壠已半圯碑
字大兼寸隸法有古氣而不著書人文
乃盧思道也是知碑在宋時已堙翳於
犁田行潦間宜自來金石著錄家所未
見近人南匯沈氏僅得一殘拓趙撝叔

據以入寰宇訪碑補錄以標手失敘并
年月及所出地未之詳審蓋道光閒碑
始發見其半墨本絕少其墓在今磁州
城南與高翻碑相近迨光緒中葉好事
者因拓翻志搜討及之乃獲傳世豐碑
屹然文字奇古余藏有精拓完本碑陰
首刻王第五弟太尉安德王經墓興感
詩五言書體勁茂詩有激楚之音所謂
獨有魚山樹鬱鬱向西傾其義卽隱寓
失取關西之遺恨長恭以芒山之捷功

高震主卒以鵠薨讀其飲藥呼天嗚啞
對鄭妃之言吁可哀也已歿後鄭以頸
珠施佛廣陵王使贖之延宗手書以諫
而淚滿紙證以此詩望碑墮淚之辭其
忼慨悲歌篤於同氣亦足多也今詞有
越調蘭陵王凡三段二十四拍卽長恭
著假面與周師戰於金塘武士共歌謠
之爲入陣曲者此其遺聲也毛幵謂紹
興初都下盛行清真詠柳蘭陵王慢西
樓南瓦皆歌之凡三換頭至末段聲尤

激越惟教坊老笛師能倚之以節歌者
余因和周詞卽以詠題蘭陵王碑爲東
山繼聲亦一雅故也

壠楸直西向魚山更碧殘陽外衰草亂鴉猶
作蒼茫陣雲色歸魂念報國空識青蠅弔客
英雄淚長使滿襟花落荒丘委三尺 豐碑
感陳迹賸蘚墨留銘樵采分席城南空見烏
爭食嗟百戰身世一抔榛莽邯鄲今古夢裏
驛眺風雨原北 哀惻古懷積但樂府聲流
旋凱歌寂嘯鵠夜月悲何極更玉樹同壤紫

庭孤笛千秋華表有墜露帶恨滴

瑞鶴仙

桂叢香到枕漸透簾蛩語涼煙催暝林容早
霜近悄江天過雁庭階紅冷重門夜迴鎖秋
聲詩愁萬頃更冥冥滿地歌塵拍徧畫闌誰
應還聽頽檐飛雨亂葉昏燈替人幽哽羈
魂未醒柰猶是去年病歎人間有限淒涼風
物偏與多情管領莫吟殘鏡裏花枝夢來照
影

拜星月慢

秋夜聞笛和清真

潤逼煙紗涼添山枕待月簾陰竹暗笛語飄
來隔燈痕鄰院悵流景漸覺銀牀玉簟疏冷
露葉霜花明爛照水秋魂繞空廊誰見 鏡
屏中尙識吳娘面無人唱暮雨清尊畔莫問
翠冶紅驕總行雲催散燕重來寂寞西風館
年華淚錦瑟聞長歎但夢地百轉飊輪觸回
腸欲斷

蹋莎行

曳柳蟬疏黏莎螢小過雲流響初鴻到上燈

花影隔窗深下簾月氣侵階悄
琴思吟銷
茶香夢裏露牀滴翠凝清篠年光有味是新
涼不堪獨夜悲秋早

六醜

芙蓉謝後作

又年芳催老悄立徧闌干危碧怨花後期無
言花暗泣黦地誰惜更灑黃昏雨水環風佩
數斷紅消息羅裳白染秋江色總帳纔遮珠
茵旋積盈盈怎堪拏摘只輕朱薄粉愁上簪
幘
西園霜夕照清池宴席步綺淩波地成

往迹尊前換盡吟客縱仙城夢見玉顏非昔
釵鈿墜似曾相識終不向一鏡東風媚晚鬢
邊狼藉飄零恨獨在江國怕舊題錦段重重
淚無人贈得

彩雲歸

九日城東亭登高

危亭鎖翠倚崇岡帶虛嵐故國斜陽看冷楓
暮色餘霞散波路迴暝入秋鄉更堪催小城
寒信到西風雁行向此念舊遊天遠立盡昏
黃 茫茫登臨百感鎮銷凝海漲塵荒昨宵

酒醒何處殘笛又繞空梁甚百年悲秋未了
只恁風物淒涼傷心是簪到黃花綠鬢先霜
雪梅香

亭皋見月曠然起故園之思

雨初歇憑高極目送荒寒攬征蓬千里煙光
澹著愁顏秋盡林皋到殘月夜明樓閣起虛
瀾雁聲落笛裏人家猶夢關山無端換離
景一片傷心畫出應難水闊天低望中故國
雲還亂葉從風訴飄泊晚花凝露淚闌干歸
來後滿鏡清霜腸斷誰看

蹋莎行

樹老知門山寒近屋一年風物供吟足秋聲
到地總無名和愁題上闌干曲夢換紗櫺
吟殘畫燭空階雨斷蛩聲續霜前籬菊爲誰
黃人閒秋鬢無重綠

夜半樂

秋盡夜聞雨有懷

暝寒中酒情味江天漠漠秋盡仍連雨繞舊
綠闌干覓愁無處砌蛩乍咽城烏旋起滿廊
黃葉飄零散風還聚背暗燭敲簾作人語

夜窗又到雁陣獨掩低幃更添沈炷霜堞隱
羌笳淒淒危曙淚凝叢菊魂縈蔓草幾回夢
裏登臨亂山歧路渺京國蒼茫見煙霧此
際追感少日狂遊舊家歌舞念俊約經時動
離阻恁蕭條空歎雪滿梁園賦驚歲事一卧
滄江暮畫樓天遠孤雲去

慶春宮

冬緒羈吟

紅葉家林蒼煙鄰寺歲殘未了秋聲門柳鴉
寒庭莎蜚老浸霜月氣冥冥夜窗燈暈鎮搖

落山川舊情傷心年事何限繁華不抵飄零
追思結客幽并連騎雲驕看劒星橫誰分
蕭條哀時詞賦過江無淚堪傾暮鴻天遠柰
重拍燕歌自驚一生怊悵拚與江南空老蘭
成

雪梅香

夢半塘老人

影悽寂虛梁落月暗驚逢悵孤鴻天外哀絃
響絕秋空遺世高情謝猿鶴過江餘淚送蛟
龍敘愁闊少別千年猶是恩恩幽蹤曠延

佇萍雨蘿煙夜歎誰同送客衰蘭漫悲舊曲
回風故國傷心渺天北暮雲何意戀江東沈
沈恨一枕關山魂繞青楓

念奴嬌

己酉除夕

夜闌酒醒縱天涯有夢無家歸得三十年來
悵悵地最是銷魂今夕舊瀝梅灰新籠竹火
節物供愁色寒窗燈在隔年紅淚猶滴誰
分有限生涯傷心餘事作江南詞客只道東
風能換世腸斷故園消息蠻雪零牋燕塵衰

帽觸緒增悽寂朝來看鏡對花空笑頭白

石州慢

水邊籬落忽見橫枝病起尋春感時悽
異

竹外橫斜猶是去年春在江國垂垂雪老煙
疏一樹暗催頭白西崦舊賞總誤天際輕陰
山橋誰倚傷心碧悵悵又黃昏但詩痕愁覓
追憶故宮春夢點額人歸墜鈿消息空有
翠禽嗁恨花間曾識璫枝未寄那更連雨淒
寒飄零不待南樓笛繞樹再來看怨東風無

力

念奴嬌

友人見示江南春圖兼寄金陵懷古之
什感事因題

酒旗風影漾迴波不斷春愁千斛中有過江
名士淚銷得新亭一掬老子婆娑英雄割據
莫舉傷高目江南春好送人惟有哀曲誰
念玉塵風流虛元談未了神州沈陸空弔金
城衰柳色依舊江潭悽綠故國鶉聲荒山龍
氣終古蒼黃局歌塵如夢野花開徧陵谷

祭天神

題歸鶴圖爲彊邨翁作

歎歲寒殘雪誰堪語
換蒼苔舊步荒江橋上
路西園夢後重尋賸有閒鷗侶
柰滄江照影
依依階前舞寂寞送孤雲去
漫追惜仙客
歸來誤江山在人物改一霎成今古
念茫茫
蟲沙陳迹天海風聲獨立斜陽自斷淩霄羽
滿庭芳

庚戌除夜聽雨守歲有懷京師風物之
盛荏苒三十餘年無一到眼天時人事

有足悲者今夕何夕不覺老懷之枵觸
也

街鼓新雷衣篝香霧歲華銷盡愁邊小城梅
訊春思破蠻牋更聽疏林過雨寒宵伴孤鶴
無眠空贏得屠蘇飲分一醉老來便 悽然
催向曉綠窗兒女還擁燈前怕新披麻日驚
換星躔長記神京瑞景何時再雲物瞻天今
休說松風閉戶猶有著書年

樵風樂府卷九

高密鄭文焯叔問

陽春曲

憶梅西崦

晚來風朝來雨心事問春誰託一塢雪垂垂
西崦路夢地經慣被花覺暝寒猶惡看未足
野橋疏萼須信舊識青山勝傷春等閒籬落
記歌繞珍叢行雲暮曾倚竹空憐翠薄而
今遺芳獨坐怨書期訴與遼鶴扁舟柰有素
約怕笛裏江城蕭索待扶醉滿把東風影沈

沈夜酌

前調

春江題夢

綺羅叢芳菲節春到夢中鄉國凝澹畫樓人
行雲斷翠袖重倚暮寒惻幾年相憶曾醉蹋
鳳城燈夕誰念繫月黏花仗東風總愁無力
悵流水鈿車繁華地空冷落珠塵綺席天
涯傷春不見翦梅枝怨寄遙驛憑闌對此歎
息更淚盡離亭殘笛看歸雁更帶冥冥雨西
山白碧

浣溪沙

春雨渡江有憶

一雨春江徧綠莎。去帆風疾晚生波。亂流欲
渡柰愁何。長是人情不如鳥，青禽填海鵲
填河縱成遺恨也情多。

前調

聞雨憶山中春事

舊泊湖亭唱蹋莎。暗香添酒淚添波。兩山愁
損鏡中螺。莫待登臨傷往事，更無哀樂費
清歌。一年風雨爲春多。

卜算子

辛亥歲始春故人治舟相約觀梅於鄧尉諸山雨雪載塗余以畏寒不出因憶山中討春舊遊次韻白石道人梅花八詠以示同志一丘一壑自謂過之若所作則儗歌無復雅句也

低唱暗香人舊識
淩波路行盡
江南夢裏春
老興天慳與
橋上弄珠來
煙水空寒處
萬頃頗黎爛玉盤
月好無人賦

虎山橋跨湖通東西
兩崦林壑尤美

常年看花舊泊地也憶乙巳元夕攜
侍兒可可吹笛橋上波月連珠如鏡
中遊光景奇絕

瑤步起仙塵鈿額添宮樣一閉松風水月中
寂寞空山賞詩版舊題香盛蹟成追想花
下曾聞玉輦過夜夜青禽唱

元墓山聖恩寺爲南巡舊頓四宜
堂有仁廟書松風水月今石刻猶
在又還元閣上詩版刻沈歸愚宋牧
仲諸名公鄧尉探梅唱和之作

數點歲寒心百尺蒼雲覆落盡高花有好枝
玉骨如詩瘦 卧影近池看露坐移尊就竹
外何人倚暮寒香雪和衣透

柏因社在五峰西麓鄧司徒廟四古
柏舊與陽山龍母祠晉柏西山福源
寺梁松並稱奇蹟花蔭老樹下古雪
布濩人影皆碧

枝亞野橋斜香暗巖扉迴瘦出花南幾尺山
一塢蒼苔靜 夢老石生芝開眼皆奇景大
好青山玉樹埋明月前身影

青芝塢面西磧一小丘升陟不十步
而盡攬西南諸峰之秀於看梅尤宜
嘗欲營墓田於此舊題有眠雲無地
青芝老虛被樵漁識姓名之句念此
惘然

一櫂過湖西曾載雙崦雪蹋葉尋花到幾峰
古寺詩聲徹林卧共僧吟樹老無花折何
必桃源別有春心境成孤絕

安山東有坳里相傳古寺中多南宋
時老梅香色奇豔壬午春從虎山橋

趁魚艇過湖五六里直西入曲港水
盡便得一山因訪詩僧泯高莎坐鼓
琴緇英藉地琅然如扣哀玉極山澤
幽渺之思又湖陰連山皆桂叢翠陰
蔽虧亦一絕境惜茲遊之不能再也
刻翠竹聲寒埽綠苔文細四壁花藏一寺山
香國閒中味對鏡兩蛾顰想像西施醉欲
喚鴟夷載拍浮可解傷春意

蟠螭山桀立湖中四絕孤秀有石壁
大可數畝天作畫屏兩山橫黛宛然

西子窺鏡一顰山上有望湖臺嘗偕
中實子復乘月卧石上題墨殆徧余
年例看梅信宿此山舊句多在吟口
雲疊玉棱棱琴筑流澌咽漫把南枝贈北人
隴上傷今別 秀麓夢重尋泉石空高潔臺
上看誰卧雪來獨共寒香說

彈山近湖陰亂石疊翠爲萬峰臺明
趙宦光大書石樓二字刻其上傾崖
架空雲濤四盪山坳修竹疏挺石泉
湛然最爲勝處時俞子恪士山中看

花還將有提學隴西之役因寄慨於

江南一枝

初月散林煙近水明籬落昨夜東風犯雪來
夢地春拋卻最負五湖心不爲風波惡笑
看青山也白頭一醉花應覺

白浮近法華漁洋兩山余愛其名嘗
以花時從石壁寺門前衝雪泛舟升
眺七十二峰如浮杯在几案故韻末
及之山舊多梅林環西麓皆水田使
盡其四肢之敏從事一山可以卒歲

余初南遊便欲買此山樓遜懷之有
年高蹈終違勿勿不知老之將至已
念奴嬌

曩與同社張兄子復觀梅元墓山中嘗
次韻白石是閔爲山僧覺阿題梅花庵
圖遊客輒見而和之今春彊邨映庵諸
子過此山樓見舊題感歎不置亦連句
屬和余旣衰嬾未預斯遊誦其詞不禁
傷春懷舊交慨於心因復悵然繼作

夜寒鶴夢正沈沈雲海猶呼愁侶自見傷春

花濺淚此恨都無年數笛步波遙詩痕雪在
曾卧山樓雨苔闌如繡勝看紗影籠句長
憶一別文園蜀絃腸斷空送孤雲去欲寄隴
頭春不到綠徧行吟煙浦古寺遺芳小橋疏
影留伴樵風住遊塵重省亂花多少歧路

瑞鶴仙

落梅

虎山橋下水問幾時銷盡傷春清淚花前舊
吟袂繞闌干如夢東風還是相思未寄薦青
尊高寒自倚恁飄零畫角聲中忍見送春桃

李 何意煙橫雪亂數點芳心爲誰顚頰苔
茵漫綴無人見斷魂地歎垂垂一樹江南遺
恨不到靈均楚佩但黃昏寫照空池兩三瘦
蕊

摸魚子

小城晚眺

壓危闌亂山空翠盡成衣上雲霧壞宮芳草
尋常見不用凭高懷古回首處渺一髮中原
挂在斜陽樹傷春更苦想瑤島花飛玉樓簾
捲天半起簫鼓 蒼茫裏時有東風雁度沈

沈遼海歸路已憐柳色悽羌笛猶報玉關春
阻江上暮又落絮吹愁散作千家雨吳魂自
語但滿地驚波兩三點雪棲老舊鷗鷺

念奴嬌

秋雨連江哀時書事

舊家樓閣賸斜陽一線沈沈簾影海上忽聞
風雨至平地奔濤千頃大澤鴻哀荒塗龍戰
身世滄洲迴塵中回首五湖何處煙艇因
念蜀客船迴高江急峽淚溼聽猿枕不待山
川搖落後秋氣都成悲境衰草連雲驚煙到

海灑袂西風冷飛輪腸轉夜闌殘夢誰醒

早梅芳近

辛亥中秋後三日澹庵招同彊邨汎舟
越來谿尋石湖居士故蹟自橫塘載月
而歸

水萍疏霜葉冷一塔招提境歌鈿塵斷畫舸

波閒見明鏡故橋鷗鷺迹壞壁龍蛇影

宋孝宗書

石湖兩大字今猶在巖西壁看雲歸鳥沒客思正孤迥

緩清觴攬素景秋倦登臨興侵谿漁火蹋月
菱謳半煙暝淚添波入酒夢破山橫枕漫重

來載愁湖上艇

臨江仙引

九日有懷瞻園時方辟兵海上用耆卿
仙呂宮賦此

暝蹋小城路亂鴉策策班馬蕭蕭暮塵起時
聞鼓角荒譙漂搖對江樹冷墟煙悄落日漁
樵傷心地正萬方多難潦倒登高魂銷衰
蘭委佩回首清些難招念東門蕪廢北渚萍
飄蕭條歎茱萸會風波阻去國迢迢悲秋淚
換滿江鄒淥胸塊誰澆

慶春宮

同羈夜集秋晚敘意

霜月流階蕪煙銜苑戍笳愁度嚴城殘雁關
山寒蛩庭戶斷腸今夜同聽繞闌危步萬葉
戰風濤白驚悲秋身世翻羨垂楊猶解先零
行歌去國心情寶劒淒涼淚燭縱橫臨老
中原驚塵滿目朔風都作邊聲夢沈雲海柰
寂寞魚龍未醒傷心詞客如此江南哀斷無
名

水龍吟

送秋

故園從此無花可憐秋盡誰家苑連城江氣
傷心一白飛蓬夢遠鶴老雲孤蟲悽天瘦歲
寒空戀怪西風容易者般搖落爭留待東風
轉不信江南腸斷放哀歌楚聲先變山川
猶是英雄安在登臨恨晚野戍殘燐江烽危
照蒼茫望眼但愁波到海何人借與快并刀
翦

前調

昔東坡謂淵明先生讀史述九章夷齊

箕子蓋有感而云余考其蜡日篇發端
於風雪餘運終託之章山奇歌其詩皆
當在元熙禪代時作時先生年已五十
有六遂以江濱佚老遯世自絕其志可
哀也已何意去此千五百餘年舊國之
感異代同悲患難餘生行年差合今之
視昔身世共之而變端之來心存目替
其愴怳殆有甚焉輒擬東坡取陶詩入
詞遺意作越調水龍吟歌之

我懷栗里高風醉來無復逃名地黃農宇宙

荒唐一夢人間何世八表同昏孤雲自遠茫
茫天意歎滄江白髮酒醒甚處空回首山河
異直道傷心往事百年中眼看能幾如何
轉燭支離南北餘生至此落木悲秋殘尊送
臘感時危涕念故山薇老誰歌采采向斜陽
裏

永遇樂

春夜夢落梅感憶因題

江驛迢迢片時枕上春事如許亂插晴霄低
橫野水悽斷東風主枝南枝北眼看搖落不

爲翠禽啼住攬遺芳
琉璃滿抱覺來頓成今
古
虛堂酒醒傾城消息誤
盡故山風雨玉砌雕闌
傷心還見繫馬郊園樹
人閒空有曉寒一曲誰
信隔紗煙語恁淒涼南
樓夜笛送春舊處

水龍吟

人日尋梅吳小城有懷關隴舊遊

故宮何處斜陽只今一片銷魂土
蒼黃望斷虛巖靈氣亂雲寒樹對
此茫茫何曾西子能傾一顧但水
漂花出無人見也回闌繞空懷

古別有傷心高處折梅枝怨春無主隴頭
人在定悲搖落驛塵猶阻報答東風待催羌
笛關山飛度甚西江舊月夜深還過爲予清
苦

楊柳枝

賦小城梅枝

誰家笛裏返生香傾國風流解斷腸頭白傷
春無限思不應此樹管興亡
到地春風不肯閒南枝吹盡北枝殘吳宮多
少傷心色占得牆東幾尺山

采香徑裏晚煙空
濯粉池邊曉露叢
一樣故宮春
寂寞可憐無地看東風

綃衣月下見前身
隔世驚逢絕世人
怊悵谿南數枝雪
爲誰開落與江春

輕朱薄粉試妝新
漫比西施鏡裏春
可惜君王殘霸業
只教換得兩蛾顰

江樹猶傷舊國春
肯因冷澹與時新
風來誰撼千林雪
一洗人間桃李塵

萬枝寒玉照谿橋
鶴語今年雪未銷
自占東風故城曲
淒涼煙月屬前朝

一點芳心作意酸預知年事有彫殘只應從此無花著勝與松筠守歲寒

虞美人

題燕池落花圖池在京西丹棱汧舊名西湖發源玉泉山度圓明園宮牆東流入清河水經注所謂薊縣西湖綠水澍澹燕之舊池者也

西園舊是滄波苑幾度臨花宴蓬萊宮闕總生塵猶有一湖春色解留人當年湖上游仙迹換得傷心碧麝塵蠶粉滿亭池怱悵倚

簾人去未多時

斷紅一片宮溝水春皺波難起夜聞風雨葬
傾城須信人間天上等飄零 雕輪寶馬城
西路轉燭空煙霧流鶯休覓上陽花已是綠
陰芳草徧人家

樓臺返照空明鏡更落西山影狂香野粉滿
天愁斷送東風一翦水西流 朝朝洗面燕
支淚染作丹棱水淒涼還問畫中人誰分故
園從此見殘春

右茗雅舊橐四卷始壬寅訖辛亥凡一百

七十二首刪存一百十首